

續資治通鑑

續資治通鑑卷第一百二十八

陽王及鎮節制縣縣都督總領北湖等處地方事務兼領節度使至都督府治所

宋紀一百二十八

起著雍執徐正月盡上章
敦牂三月凡二年有奇

高宗受命中興全功至德聖神武文昭仁憲孝皇帝

紹興十八年

金皇統八年

正月甲子以永祐陵近在會稽

準先朝故事春秋二仲以太常少卿薦獻季秋則御史
按視丁丑左承議郎張闡添差通判泉州自秦檜專
國朝士爲所忌者終身以添倅或帥幕處之未嘗有爲
郡者二月乙未參知政事段拂罷爲資政殿學士提

舉江州太平興國宮以殿中侍御史余堯弼右正言巫
伋奏劾之也章再上尋落職興國軍居住 簽書樞密
院事汪勃兼權參知政事 王子右承事郎監登聞鼓
院徐璉面對言自咎帝王必有佐命之臣功銘鼎彝侑
食清廟以勸萬世國家遠稽三代肇造原廟凡在佐命
輔弼皆繪像廟廷以示報功之意陛下紹開中興復崇
原廟如祖宗之制而累朝配饗輔弼不過十餘人今其
家之子孫必有繪像存焉望詔有司訪求摹於景靈宮
廷之兩壁詔禮部討論 乙卯金主如天開殿 三月
壬申名行宮之南門曰麗正北門曰和寧 時殿前招

多誘致鄉民及負販者丁丑命川中大將吳璘楊政
招流民之失所者遣發以補其額 壬午資政殿大學
士提舉萬壽觀兼侍讀秦熈知樞密院事秦檜問敕令
所刪定官胡寧曰兒子近除外議如何寧曰外議以爲
相公不必襲蔡京之迹寧安國子也 乙酉詔私擅渡
淮及招納叛亡之人竝行軍法後詔津載及巡防人故
縱與同罪失察者減一官 夏四月戊子朔日有食之
庚寅策試正奏名進士於射殿王佐以下三百三十
人賜及第出身 庚子左中大夫知樞密院事秦熈罷
爲觀文殿學士左通奉大夫提舉萬壽觀兼侍讀提舉

祕書省焙言父子共政理當避嫌故有是命仍詔焙應
干請給竝依見任宰臣例立班左右僕射之次 辛丑
金遣參知政事秉德廉察官吏 乙巳特奏名進士俞
舜凱等四百五十七人武舉進士柯燕等七人特奏名
一人賜第授官有差 庚戌金主至自天開殿先是金
命修遼史甲寅告成 五月辛酉權禮部侍郎兼直學
士院沈該言國家秉火德之運以王天下望用故事卽
道宮別立一殿專奉火德配以閼伯而祀以夏至從之
後建殿於太一宮名明離 甲子繪配饗功臣像於景
靈宮廷之壁皇武殿趙普曹彬大定殿薛居正石熙載

潘美熙文殿李沆王旦李繼隆美成殿王曾呂夷簡曹
瑋治隆殿韓琦曾公亮大明殿富弼重光殿司馬光承
元殿韓忠彥凡十有六人 丙子金主使龍虎衛上將
軍會寧尹蕭秉溫昭武大將軍充東上閣門使申奉顏
來賀天申節始燕射於玉津園自是遂爲故事 癸未
係信軍節度使龍神衛四廂都指揮使添差兩浙東路
馬步軍副都總管李顯忠落軍職除授平海軍承宣使
提舉台州崇道觀本州居住先是金使嘗言顯忠私遣
過界詔令分析會顯忠上恢復之策於朝秦檜怒乃奏
顯忠不遵稟聞正用申狀故有是命 六月癸巳帝謂

大臣曰每歲決獄聞憲臣第遣屬官代行徒爲文具可
令親往所部具所決名申尙書省 詔自今嘗於僞楚
明受僞命之人不得輒至國門時左從事郎廉布入都
調官右正言巫伋言布乃張邦昌之壻覆載所不容而
無忌憚若此望賜處分故有是旨 庚子命監司郡守
約束縣令無使非理擾民 甲辰用太常寺主簿兼權
祕書省校勘書籍林大鼐議始祀九宮貴神於東郊壇
二成高三尺方十有二尺上爲小壇九縱廣皆八尺高
尺有半歲春秋二仲祀以少牢禮如感生帝 乙巳敷
文閣待制知臨安府趙不棄守尙書工部侍郎 丙午

賢妃潘氏薨妃元懿太子母也 乙卯金以平章政事

蕭仲恭爲行臺左丞相以左丞亮爲平章政事以都點
檢唐古辨爲尙書左丞 秋七月乙丑右朝奉大夫新
江西轉運判官賈直清請於縣官中以有出身人兼縣
學教導帝謂大臣曰州縣選官教導乃教化本原將來
三年科場亦有人材可備采擇乃令禮部參酌如所請
知臨安府湯鵬舉請修淮浙沿流皇華使館從之

乙亥金御史大夫布薩達曼罷以侍衛親軍都指揮使

阿魯岱

舊倫阿魯
帶今改

爲御史大夫戊寅以尙書左丞唐古

辨奉職不謹杖之 八月癸巳權禮部侍郎沈該乞四

川類省試合格不赴殿試人第一等並賜進士出身餘人同出身從之 丙申端明殿學士簽書樞密事汪勃罷勃爲言者所攻以親老乞歸養詔依舊職提舉江州太平興國宮 丁酉工部尙書詹大方爲端明殿學士簽書樞密院事尋權參知政事 戊戌金監修國史太師宗弼等進太祖實錄 庚子金以尙書左丞相助領行臺尙書省事以右丞相宗賢爲太保尙書右丞相丙午以行臺左丞相蕭仲恭爲尙書左丞相 癸丑刑部尙書兼權吏部尙書周三畏薨以侍御史余堯弼論其兼領二曹一切要譽歸怨朝廷也 甲寅國子司業陳

誠之權尙書吏部侍郎 大理寺韓仲通權刑部侍郎

閏月庚申親衛大夫忠州刺史鄂州駐劄御前選鋒
軍同副統制梁興卒興自太行山率其徒奔岳飛於江
夏從軍凡十年 金宰臣以西林多鹿請金主出獵金
主恐害稼不允 丙寅金太廟成 戊辰權禮部侍郎
陳誠之請太學生入學五年不與薦及公試不入等者
除其籍從之 壬申命起居舍人王罍卿武經大夫惠
州刺史閤門宣贊舍人蘇華賀金主正旦權尙書禮部
侍郎陳誠之武經大夫吉州刺史權知閤門事孟思恭
賀生辰 乙酉詔自今奉使下三節人過界與北人博

易者徒二年使副不覺察與同罪 初福建路自創奇
兵虔梅草寇不敢復入境至是悉平詔以巡檢陳敵以
所部奇兵四百及汀漳戍兵之在閩者竝爲殿前司左
翼軍卽以敵爲統制官畱戍其地神武中軍舊止三部
自楊存中職殿前始增爲五軍又置護聖踏白選鋒策
選鋒游奕神勇馬步凡十二軍時江海之間盜賊間作
乃分置諸軍以控制之如泉之左翼循之摧鋒明之水
軍皆隸本司總七萬餘人由是殿前司兵籍爲天下冠
存中又制諸軍戎仗以克敵弓雖勁而士病曠張之難
乃增損舊制造馬黃弩制度精密彼一矢未竟而此三

發矣 九月甲辰侍御史兼崇政殿說書余堯弼試御史中丞 丙午端明殿學士簽書樞密院事詹大方薨 丁未右司諫兼崇政殿說書丞伋試右諫議大夫

丙申金尚書左丞唐古辨罷以左宣徽使稟爲尚書左丞 冬十月丙辰御史中丞兼侍講余堯弼爲端明殿學士簽書樞密院事兼權參知政事 辛酉金太保領

三省事都元帥越國王宗弼薨後諡忠烈

（攷異）宗弼之歿繫年要錄

倫皇統五年今從金史紀傳

十一月乙酉朔祕書少監張杞言威

生帝之祀尙寓招提祭以酒脯請復用牲玉升爲上祀從之 乙未金左丞相宗賢左丞稟等言州縣長吏當

竝用本國人金主曰四海之內皆朕臣子若分別待之豈能致一諺不云乎疑人勿使使人勿疑自今本國及諸色人量才通用之 己亥新州編管人胡銓移吉陽軍編管先是秦檜嘗於一德格天閣下書趙鼎李光胡銓三人姓名時鼎光皆在海南廣東經略使王鐵問右承議郎知新州張棣曰胡銓何故未過海銓嘗賦詞云駕巾車歸去有豺狼當轍棣卽奏銓不自省循與見任寄居官往來唱和怨望朝廷鼓唱前說殊無忌憚於是送過海編管棣遣使臣游崇部送封小項筒過海銓健步赴貶人皆憐之至雷州守臣王趙廉得崇以私茗自

隨械送獄且厚餉銓時諸道望風拑撻流人以爲奇貨
惟趯能與流人調護海上無薪粢百物趯輒津置之其
後卒以此得罪 辛丑金以尙書左丞相宗賢爲左副
元帥以平章政事亮爲尙書左丞相兼侍中以參知政
事秉德爲平章政事 丁未龍神衛四廂都指揮使邕
州觀察使董先添差兩浙西路馬步軍副都總管平江
府駐劄初岳飛旣死先自武昌召還爲步軍司統制先
與管軍趙密不協於是離軍領前都指揮使職事 庚
戌金左副元帥宗賢復太保左丞相左副元帥如故
十二月乙卯朔復連州連山鎮爲縣 金以右丞相蕭

仲恭爲太傅領三省事以左丞相亮爲尙書右丞相

丁卯布衣孫堯佐上書乞嗣安定郡王與濮王之封詔

大宗正司具名聞奏 己巳大理評事莫濛言四方之

民雲集二浙百倍常時而河渠爲甚急宜命守臣因農
之隙濬其堙塞庚午帝諭大臣曰可使漕臣募夫濬治

因以濟接饑民則公私兩利矣 壬申宰執進呈經界

事詔帝曰諸州月椿錢昨已例減要當盡行除罷秦桧

卽諭戶部侍郎李椿年宋貺以經總錢措置贍軍 乙

亥金以左丞相宗賢爲太師領三省事兼都元帥 庚

辰金遣金吾衛上將軍殿前右副都點檢召守忠昭武

大將軍同知宣徽院事劉君詔來賀來年正旦先是

金左丞相亮之爲中京畱守也與明安蕭裕善裕傾險

敢決亮每與論天下事裕揣亮有覬覦心密謂亮曰先

太師

謂宗幹

爲太祖長子德望如此人心天意宜有所屬

公誠有志舉大事願竭力以從亮喜之數相薦引由兵

部侍郎遷同知南京畱守改北京同知畱守事時金舊

臣宗弼旣歿皇后益攬事權奚人蕭肄有寵於金主復

詔事皇后恣行不法亮內蓄逆謀無所顧畏尙書省令

史高懷貞素與亮狎昵亮嘗與各言所志亮曰吾志有

三國家大事皆自我出一也帥師伐國執其君長問罪

於前二也得天下絕色而妻之三也由是小夫佞人皆知其志是歲夏復建內學選名儒主之增修律成賜名曰新律

紹興十九年

金皇統九年十二月改天德元年

春正月甲申朔帝以太

后年七十卽宮中行慶壽禮

丁亥詔信陽軍撥隸淮

西已丑北使召守忠等辭行置酒垂拱殿時在上辛

祈穀致齋之內禮官援治平故事請用樂從之自是以

爲例戊戌金太師領三省事都元帥宗賢罷以領行

臺尙書省事勛爲太師領三省事以同判大宗正事充

爲尙書左丞相亮兼元帥亮生日金主使近侍大興國

賜物皇后亦有所附賜金主知之不悅杖興國百追還其賜物亮由此愈不自安充宗幹長子也尋薨 丙午

金以右丞相亮爲左丞相以判大宗正事宗本爲尙書右丞相以左副元帥宗敏爲都元帥以南京畱守宗賢爲左副元帥兼西京畱守已酉宗賢復爲太保領三省事 二月甲寅金以會寧牧唐古辨復爲尙書左丞以尙書左丞稟爲行臺平章政事 甲子復置雷州遂溪

縣 庚辰帝謂輔臣曰每歲市馬悉付鎮江王勝軍而未見孳生之數宜分送諸軍仍立賞罰於是歲發川馬二百匹進御而以四千匹付江上諸軍鎮江建康荆鄂

軍七百五十江池軍各五百又以秦馬三千五百付三衙殿前司千五百馬步各千自是歲爲定例 三月癸未朔日有食之陰雲不見帝不視事百官守職過時乃罷甲申詔皇太后慶壽親屬各進官一等慈寧殿官推恩有差 庚子帝諭大臣曰淮甸久平宜加經理民復業者令守令多方卹之使盡力田畝數年後方可起稅 辛丑金以尙書右丞相宗本兼中書令以左丞相亮爲太保領三省事亮益求名譽引用勢望子孫結其驩心金主不悟 甲辰詔責授濠州團練副使復州安置鄖剛中許用議減特免禁錮移封州安置初秦檜怒剛

中不已捕其子右承務郎良嗣與將吏賓客卽江州同
藥遣大理寺丞湯允恭太府寺丞宋仲堪往鞠其事掠
治無全膚獄成剛中坐任四川宣撫副使日被旨收捉
過界偷馬盜賊全不遵奉凡事干過界常是懷姦異議
陰與見罪籍人符合交通沮害國事又輒違朝命出賣
度牒收錢五十五萬餘緡又專輒起置錢監鑄錢擅便
支使及違法請過供給廚食等錢一萬三千餘緡入已
剛中欲併都轉運司入宣司遂將錢物贈移士人令赴
行在上書開陳旣併運司違法私使過錢十二萬餘緡
及有詔置總領錢糧官剛中不喜豫倫緣故收椿隱匿

計四千餘萬緡又欲歸怨朝廷乃說諭統兵官令爲總
領盡數交併錢物無可送遺及被旨令赴行在乃忿怒
遷延收匿劄子不卽起發多帶官物在路妄用法當死
特有是命良嗣貸死送柳州右朝請郎張漢之嘗主管
宣撫司機宜文字坐依隨剛中亦除名送賓州編管右
奉議郎趙士禡嘗通判荆南府坐不卽拘收剛中隨軍
錢物特除名右武大夫開州刺史御前中部統領官張
仲亦坐依隨剛中追橫行一官勒停送本軍自劾卽日
擢充恭尙書刑部員外郎仲堪倉部員外郎剛中至貶
所守臣左朝請郎趙成之希檜意每窘辱之剛中竟卒

於貶所 夏四月乙卯權禮部陳誠之權知閣門事孟
思恭賀金主生辰還秦檜白帝曰大金書詞丁寧盟好
甚切帝曰此番待奉使愈周至館舍極宏壯思恭等所
得馬亦皆上駟可知其永好之意也 戊辰日左右生
青赤黃珥太白犯月金國太史言不利於君大臣將佗
亂壬申金京師大風雨雷電震壞寢殿鴟尾有火入金
主寢殿燒幃幔金主趨別殿避之丁丑有龍鬬於利州
榆林河水上大風壞民居官舍瓦木人畜皆飄十數里
死傷者數百人 五月甲申剏太廟齋殿 乙酉戶部
員外郎周莊仲請復螭祭之禮其禮東西方百神視威

生帝南北方視岳瀆皆以臘前一日祭之 戊子金殺翰林學士張鈞時金主以天變欲下詔罪已命鈞視草鈞意謂奉答天戒當淡自貶損其文有曰惟德弗類上千天戒及顧茲寡昧眇予小子等語參知政事蕭肄素惡鈞乃譁奏曰弗類是大無道寡者孤獨無親昧者弗曉人事眇者目無所見小子嬰孩之稱此漢人託文字以詈主上也金主大怒命衛士拽鈞下殿榜之百不死以手劒釐其口而臨之賜肄通天犀帶是日曲赦上京囚 金主問羣臣曰張鈞謫誰使爲之左丞相宗賢曰太保實然金主不悅庚寅出太保亮領行臺尙書省

事亮道過北京謂同知畱守事蕭裕曰我欲就河南建立位號先定兩河舉兵而北君爲我結諸明安以應我定約而去 庚子金主使龍虎衛上將軍殿前左副都點檢唐括德溫昭武大將軍四方館使高居安來賀天申節 六月辛亥朔故事宗廟時祠以宗室觀察使以上充初獻刺史以上充亞獻終獻其後以宗室數少乃請初獻以防禦使以上亞終獻以遙刺以上至是正任止三人壬子太宗正司請權以遙團以上充初獻將軍以上充亞獻許之 己未金以都元帥宗敏爲太保領三省事兼左副都元帥左丞相宗賢兼都元帥 辛酉

右朝奉郎朱同知南雄州代還言嶺南無醫凡有疾病
但求巫祝鬼束手待斃請取古今名方治瘴氣者集爲
一書頒下本路從之 秋七月辛巳左中奉大夫楊惇
知舒州代還請戒監司守臣修水利詔付戶部帝曰平
江隄堰不修歲輸米比舊虧十萬斛臨安西湖民間灌
溉所資其利不細歲久亦填汙宜悉令修治 八月庚
戌朔昭信軍承宣使鎮江府駐劄御前諸軍統制王勝
卒諡毅武 癸丑復泰州興化鎮爲縣 庚申金以剽
筭爲司空行臺右丞相如故宰臣議徙遼陽渤海之民
於燕南從之侍從高壽星等當遷訴於皇后后以白金

主金主怒議者杖平章政事秉德殺郎中薩哈 辛酉
宗正寺丞王葆言國家設法應女戶單丁與夫得解舉
人太學生竝免丁役蓋本先王仁先孤寡貴肆多士之
意頃議者歷陳丁役之弊遂有募人充役指揮臣謂進
納雜流之人物力高強雖係單丁自應僱募至若前項
三色亦令僱募似爲矯枉之過且女戶而無子孫與雖
有子孫而年在幼弱皆窮民之無告者若遽使當力役
之事則公私所費必倍於豪強故昨來指揮寡婦有男
爲僧道成丁者竝許募人充役正恐姦民旋行規避爾
今州縣之間舞文以虐無告則或指寡婦守志者不免

於執役困悴之患其勢迫而行者家貲產業或破壞於
役夫之手是豈朝廷勤恤民隱之本心乎得解舉人名
已登於天府今乃同籍於役人太學生身已隸於上庠
今乃心累於執役是二者其家或有兼丁則力役自不
妨充募若乃單丁一身而奮身庠序者不得自別於齊
民甚非陛下仁先孤寡貴肄多士之意望特詔有司重
加省定庶幾孤寡得所而士知愛重帝曰單丁女戶舊
法免差役後以許免者多有司遂有僱募之請宜令戶
部詳其的確利害來上葆崑山人也旣而本部請女戶
無子及得解舉人太學生單丁並免身役卽特旨及因

恩免解人聽募人充役官司毋得追正身從之。丙寅
太常少卿張杞充大金賀正旦使武節大夫和州團練
使知閣門事趙述副之直祕閣知臨安府湯鵬舉守司
農卿充賀生辰使右武大夫吉州刺史帶御器械石清
副之通好後以庶官出疆自此始。甲戌詔以景靈宮
繪像功臣之副藏於天章及祕閣復故事也。九月辛
卯惠州刺史知閣門事宋錢充大金賀正旦副使以趙
述疾告也。丙申金復以領行臺尙書省事亮爲平章
政事亮行至良鄉召還未測金主意大恐既至金主復
任之而亮逆謀益切初左丞唐古辨右丞相秉德以被

杖怨金主與大理卿烏達

舊倫烏達帶今改

謀廢立烏達以告亮

它日亮與辨語及廢立事曰若舉大事誰可立者辨曰

其胙王元乎問其次曰鄧王子阿林

舊倫阿林

亮曰阿林

屬疎安得立辨曰公豈有意耶亮曰果不得已舍我其

誰於是旦夕相與密謀護衛將軍特斯

舊倫特思今改

疑之以

告皇后曰辨等每竊竊私議竊疑之后以告金主金主

怒召辨謂曰爾與亮謀何事將如朕何杖之餘釋不問

戊戌金以右丞相宗本爲太保領三省事以左副帥

宗敏領行臺尙書省事以平章政事秉德爲尙書左丞

相兼中書令以司空劉筈爲平章政事

庚子金以御

史大夫宗甫參知政事 金平章政事亮以胙王元有

人望欲除之會河南軍士孫勝自稱皇弟阿禪舊倫按察今改

大王金主疑皇弟二字或在元也使特斯鞠之無狀亮

怨特斯泄其謀而知金主有疑元心乃上言孫進反有

端不稱它人乃稱皇弟大王陛下弟止有元及扎拉舊倫

查刺今改耳特斯鞠不以實故出之金主以為然使唐古辨

蕭肄按問特斯特斯自誣服故出元罪十月金主殺其

弟北京畱守胙王元安武軍節度使扎拉及左衛將軍

特斯亮乘此擠阿林殺之阿林弟達蘭舊倫撻撻今改金主本

無意誅之亮曰其兄既已伏誅其弟安得獨存又殺之

金主以亮爲忠益信任之遂降詔大赦 丙辰右承議郎知新州張棣提舉荆湖北常平茶鹽公事以其再劾胡銓也至官一日奉時責授濠州團練副使洪皓在英州閩人右承務郎倪咎爲守咎老矣內無與主聞棣以巧中遷客取使節欲效之卽使兵馬都監伺其隙捕皓家奴寘獄中釀成其罪未及發而咎死事乃解 降授文州刺史辛永宗勒停送肇慶府編管永宗爲湖南馬步軍副總管居邵州永宗以嘗立軍功給真俸守臣右朝散郎石稽中知永宗爲秦檜所惡劾其冒請全俸當計以賊請下守臣閱實稽中先以計取永宗所受御劄

送檜矣永宗由是不能自明詔稽中依條追理稽中選
郡僚之苛刻者籍其家一簪不得畱既而稽中語其僚
曰前赴其家燕集以一器酌壽今此器不見豈隱之耶
其殘刻如此 己巳初復諸陵殯宮薦新之禮用太常
博士晉陵丁斐明請也 癸酉金以翰林學士完顏京
爲御史大夫 金皇后費摩舊倫裴滿今改氏專政性妬忌挾
制金主故金主多以忿怒殺人十一月金主以積忿殺
后召胙王妃薩摩舊倫撒卯今改入宮既而又殺德妃烏庫哩
舊倫烏古論今改氏瓜勒佳舊倫夾谷今改氏張氏於是宮中近侍皆
懼矣 辛卯帝親饗太廟至櫺星門降輦步趨齋殿虛

小次不入壬辰合祀天地於南郊大赦 甲辰詔諸郡
行鄉飲酒之禮以取士先是司農卿湯鵬舉言舉人多
冒貫求試請于未下科詔前令州縣長吏籍定來歲當
應舉人名州縣學職事覆實申教授預先引保委無偽
冒然後許赴鄉飲酒若臨時投狀射保者竝不收試事
下禮部至是頒行焉 金主出獵十二月己酉朔還京

壬子軍器監王會權尙書兵部侍郎 金平章政事

亮與其黨既定逆謀欲得護衛圖克坦額埒楚克

舊俗

阿里出布

薩思恭

布薩舊俗僕散今改思恭一名呼圖舊俗忽土

近侍局直長

大興國爲內應亮先以女許字額埒楚克之子而思恭

發賤時爲宗幹所周恤擢置宿衛亮知其懷舊恩密謂
之曰我有一言欲告君久矣恐洩於人未敢也思恭曰
肌肉之外皆先太師所賜苟有補於大王死不敢辭亮
曰主上失道吾將行廢立必得君爲助乃可思恭許之
亮復以告額瑀楚克額瑀楚克素凶暴聞之甚喜曰何
不早告我廢立之事亦男子所爲主上不能保天下人
望所屬惟在阿家今日之謀乃我素志也亮旣結護衛
而金主所親信惟大興國未嘗輕去左右每逮夜金主
就寢興國時從主者取符鑰歸家主者卽以付之聽其
出入以爲常先時興國嘗薦羅卜藏舊俗李老於亮亮

用爲令史乃使羅卜藏結興國旣而知其可與謀乃邀至卧內令解衣欲與之俱卧意有所屬者興國固辭不敢曰卽有使惟大王之命亮曰主上無故殺胙王元又殺皇后乃以元財賜阿蘭旣又殺阿蘭遂以賜我我淡以爲憂興國曰是固可慮也亮曰朝臣旦夕危懼皆不自保向者我生日因皇后附賜物君遂被杖我亦見疑主上嘗言會須殺君我與君皆將不免寧坐待死何如舉大事我與大臣數人計已定矣興國曰如大王言事不可緩也乃約以初九日起事丁巳夜布薩思恭圖克坦額埒楚克內直亮及其妹夫圖克坦貞及秉德烏達

等會於唐古辨家辨因置饌眾皆恒懼不能食辨獨飽
食自若二鼓興國竊符矯詔開宮門召唐古辨守門者
以辨爲金主之駙馬不疑內之亮等懷刃隨入及殿門
衛士覺其異辨等抽刃劫之莫敢動至寢殿金主聞步
履聲咄之眾皆卻立思恭曰事至此不進得乎乃相與
排闥而入金主索榻上常所置佩刀已爲興國先取投
榻下矣額埒楚克先持刃進弑思恭次之金主仆亮復
刃之血濺其面及衣秉德意尙未有所屬思恭曰始者
議立平章今復何疑乃奉亮坐眾前稱萬歲詐以金主
將立后召諸王大臣曹國王宗敞聞召懼不敢往葛王

褒曰叔父今不及往明日如何相見宗敏入宮亮欲殺之尙猶豫以問左右烏達曰彼太祖子也不殺之眾人必有異議乃使思恭刃擊宗敏左右走避膚髮血肉狼藉徧地葛王見宗敏見殺問曰曹王何罪而死烏達曰天許大事尙已行之此蟻蚋爾何足道哉宗賢聞召謂人曰主上必欲立胙王妻爲后我當力爭之旣至被執猶以爲立后事曰誰能爲我言者我死固不足惜獨念主上左右無助耳亮旣卽位廢前主爲東昏王以秉德爲左丞相兼侍中以左副元帥唐古辨爲右丞相兼中書令以烏達爲平章政事布薩思恭爲左副點檢以圖

克坦

建克爲右副點檢圖克坦貞爲左衛將軍大

興國爲度

升於是自太師領三省事完顏勛等二十

人進爵增職各有差

己未金大赦改皇統九年爲天

德元年賜秉德等錢絹牲畜有差

金主召參知政事

蕭肄詰之曰學士張鈞何罪被誅爾何功受賞肄不能

對金主曰朕殺汝不難人或以爲報私怨也於是除名

禁錮

壬戌帝恭謝景靈宮

甲子金主誓太祖廟召

秉德辨烏達思恭額埒楚克興國六人賜以誓券金主

將謁廟以芮王亨爲右衛將軍密諭之曰朕以太宗諸

子過強以卿材武備左右耳亨宗弼子也

丙寅金以

燕京路都轉運使劉麟爲參知政事 癸酉金太傅領

三省事蕭仲恭尙書右丞稟罷以行臺尙書左丞溫都
思恭爲右丞 乙亥金主追尊其父宗幹爲皇帝廟號
德宗名其故居曰興聖宮 是月責授濠州團練副使
解潛卒潛以不附和議爲秦檜所斥旣歿喪不得歸後
檜死乃得歸葬

紹興二十年

金天德二年

春正月辛巳金以同知中京留守

事蕭裕爲祕書監

甲申金賀正旦國信副使西上閣

門使劉箴辭行國信使殿前右副都點檢完顏袞以病
不能人見命醫官趙琦送至境上金主亦遣使趣之

丁亥軍校施全劫秦檜於道執得詰之曰舉國與金爲
讐爾獨欲事金我所以欲殺爾也壬辰磔全於市由是
檜出列兵五十持長挺以自衛 癸巳金主尊嫡母圖
克坦氏及母大氏俱爲皇太后金主之弑東昏也圖克
坦聞之愕然與太祖妃蕭氏歎曰帝雖失德人臣豈可
如此及迎入宮見金主不賀金主銜之至是竝加尊號
圖克坦居東宮號永壽宮大氏居西京號永寧宮其後
圖克坦太后生日酒酣大氏起爲壽圖克坦太后方與
坐客語大氏踞者久之金主怒而出明日召諸公主宗
婦與太后語者皆杖之大氏以爲不可金主曰今日之

事豈能尙如前日耶 先是金主之父宗幹從其國俗
納齊國公宗雄之妻而宗雄妻與金主不相能金主旣
篡位囚宗雄妻於府署旋并其子及宗雄孫七人殺而
焚之棄其骨於濠水 甲午以普安郡王第三子惇爲
右內率府副率 癸卯少傅寧遠軍節度使領殿前都
指揮使職事楊杼中封恭國公 乙巳金主以勵官守
務農時慎刑罰揚側陋恤窮民節財用審才實七事詔
中外 丙午兩浙轉運判官曹泳言右承務郎李孟堅
省記父光所伦小史語涉譏謗詔送大理寺光在貶所
常伦私史孟堅間爲所親左奉議郎新王宮大小學教

授陸升之言之升之訐其事遂命泳究實帝曰光初進
用時以和議爲是及得執政遂以和議爲非其反覆如
此 先是金烏達之妻唐古鼎格舊作唐古有淫行秉
德嘗顯斥之烏達銜之未發金主旣篡位多忌會有疾
少間烏達譖之曰秉德見主上數日不視朝語臣曰若
有不諱誰當繼者臣曰主上有皇子秉德曰孺子豈能
勝任必也葛王乎金主信之遂出秉德領行臺尙書省
事阻十日內發行 二月戊申朔金封皇子宗壽爲崇
王 庚戌軍器監丞齊旦請春月禁民采捕秦檜曰正
爲孳育之時帝曰此係利害乃下之刑部旣而本部言

春月在法不許采捕 金主命給天水郡公孫女二人
月俸 丙寅初伦玉牒所 戊辰金羣臣上金主尊號
曰應天廣運睿武宣文大明聖孝皇帝詔中外永壽兩
太后祖父俱贈官有差以唐古辨爲左丞相烏達爲右
丞相金主忌辨嘗與辨觀太祖像指示辨曰此眼與
爾相似辨色動金主由是益忌之 丁丑閤門請自今
北使在庭非侍從而嘗偕官出使免起居如見充接伴
卽依所偕官叙位從之 是月安南進馴象十 三月
庚辰金主使龍虎衛上將軍侍衛親軍馬步軍都指揮
使完顏思恭翰林直學士通議大夫知制誥翟永固來

報登位遺帝金注腕二綾羅三百良馬六 癸未端明
殿學士簽書樞密院事余堯弼參知政事給事中兼侍
講權直學士院巫伋爲端明殿學士簽書樞密院事
丙戌參知政事余堯弼爲賀大金登位使鎮東軍承宣
使知閤門事鄭藻假休信節度使副之 金主以其弟
袞爲司徒兼都元帥 丙申詔責受建寧軍節度副使
昌化軍安置李光永不檢舉右承務郎李孟堅除名峽
州編管先是孟堅以小史事繫獄至是獄成光坐主和
議反覆在貶所常出怨言妄著私史譏謗朝廷意在僥
倖復用及與趙子儀於罷政後往來交結孟堅亦爲父

被罪責降怨望朝廷記念所撰小史對人揚說故有是命於是前從官及朝士連坐者八人徽猷閣直學士提舉致仕胡寅坐與光通書朋附交結譏訕朝政龍圖閣學士提舉江州太平興國宮程瑀坐初除兵部侍郎日以縑帛遺光且貽書云比來無知愚皆以視前爲戒可爲嘆息徽猷閣待制提舉江州太平興國宮潘良貴坐嘗以團茶寄光光遺良貴書其別紙云仲暉不敢與書患難至能出一隻手乎仲暉樓炤字也良貴答書曰參政患難至極矣要以道自處仲暉別紙已付之但恐時未可耳直祕閣宗穎坐嘗寄光書云孤寒寡援方賴鈞

庇忽聞遠適本欲追路一見失於接伺不果如願寶文
閣學士提舉江州太平興國宮張燾左承議郎新知邵
州許忻左朝奉大夫新福建路安撫使參議官賀允中
左奉議郎福建路安撫主管機宜文字吳元美坐各與
光相知密熟書劄往來委曲存問意尤再用更相薦引
詔寅落職瑀良貴穎竝降三官燾忻允中元美竝降二
官 庚子余堯弼辭行詔巫伋兼權參知政事 壬寅
右正言章履奏右承議郎致仕胡寅天資克悖敢爲不
義寅爲胡安國之子不肖爲親母持服士論沸騰此其
不孝之大罪也寅初傳會李綱後又從趙鼎建明不通

隣國之間其視兩宮播遷如越人視秦人之肥瘠後來
梓宮旣還皇太后獲就孝養寅自知前言狂率乃陰結
異意之人相與睥睨倫爲記文以爲今日仕進之人將
赤族而不悟此其不忠之大罪也望特賜威斷詔寅責
授果州團練副使新州安置 金主召見賀登極使出
徽宗玉帶使持以賜帝且曰此天水郡王故物今以賜
汝主俾汝主如見其父并諭汝主當不忘朕意也使退
祕書郎張仲軻曰希世之寶輕賜可惜金主曰江南之
地它日當爲我有此置之外府耳由是臣下皆知金主
有南伐意矣仲軻本市井無賴能說傳奇小說雜以俳

優談諸語爲業金主舊引致左右以資戲笑及簪位遂

擢用之俄遷祕書丞轉少監

攷異金海陵對宋使語金史列傳

附賜宋帝按是年余康弼辭行金史列傳誤也其賜帶年月仍從金史本紀

金主以良弓

賜右衛將軍芮王亨亨性直材勇絕人喜自負辭曰所

賜弓弱不可用金主遂忌之出爲真定尹謂亨曰太宗

諸子方強多在河朔山東真定據衝要如有變倚卿爲

重矣其實心思亨也 金主欲以勤政爲名召近臣講

論每至夜分嘗問起居注楊伯雄曰人君治天下其道

何貴對曰貴靜金主默然明日復謂曰我遷諸部明安

分屯邊戍前夕之對豈指是爲非靜耶對曰徙兵分屯

良策也所謂靜者乃不擾之耳乙夜復問鬼神事伯雄
進曰漢文帝召見賈誼夜半前席不問百姓而問鬼神
後世猶譏之陛下不以臣愚陋幸及天下大計鬼神之
事未之學也金主曰但言之以釋永夜倦思伯雄不得
已乃曰臣家有一卷書記人死復生或問冥官何以免
罪答曰汝置一冊白日所爲暮夜書之不可書者不可
爲也金主爲之改容

續資治通鑑卷第一百二十九

宋紀一百二十九

起上章敦牂四月盡元貳
祐雅十二月凡二年有奇

高宗受命中興全功至德聖神武文昭仁憲孝皇帝

紹興二十年

金天德二年

夏四月戊午金殺太傅領三省事

宗本及尙書左丞相唐古辨遣使殺領行臺尙書省事
秉德初金主爲宰相卽患太宗諸子強盛嘗與辨秉德
言之旣篡位并惡辨秉德乃與祕書監蕭裕密謀欲盡
殺太宗諸子而未有以文致其罪裕曰尙書省令史蕭

玉素爲宗本所厚人所共知今託爲玉告變狀以取信於人可按稽誅也謀既定使人召宗本等擊鞠金主先登樓宗本及判大宗正事宗美至卽殺之宗本旣死蕭裕使人召蕭玉是日玉送客出城醉酒露髮披衣以車載至裕第逮日暮玉酒醒見軍士守之意爲人所陷以頭觸屋壁號曰臣未嘗犯罪母年七十幸哀憐之裕附耳告之曰主上以宗本諸人不可畱今已誅之欲加以反罪令汝上告其事款狀已具矣其狀略曰秉德出領行臺與宗本別因會飲約內外相應唐古辨言內侍張彥善相相太傅有天子分宗本曰我有兄東京畱守在

我何能爲是時宗美言太傅正是太宗主家子北京留守卞臨行與宗本言事不可遲宗本等將以日近圍場內決計行之云裕引蕭玉見金主具如款狀所言金主大喜以款狀宣示中外遂殺東京留守宗懿北京留守卞等凡殺太宗子孫七十餘人太宗後遂絕烏達亦言秉德飲酒宗本家相者言其貌類趙太祖秉德偃仰笑受其言臣妻言秉德妻嘗指斥主上秉德與宗本別指斥尤甚且謂運數有歸其逆狀甚明金主遂遣人殺秉德於行臺秉德宗翰孫也宗翰子孫被殺者三十餘人宗翰後亦絕金主又殺諸宗室五十餘人辛酉金以

尙書省令史蕭玉爲禮部尙書祕書監蕭裕爲尙書左丞右丞相烏達爲司空左丞相兼侍中賞告變功也以劉筈爲尙書右丞相宗義溫都思忠爲平章政事以劉麟爲尙書右丞以布薩思恭爲殿前都點檢 癸酉左朝奉大夫新知廬州吳達言兩淮之間平原沃壤土皆膏腴宜穀易墾稍施夫力歲則有收而茅葦翳塞莫之加功望置力田之科募民就耕賞以官資闢田以廣官莊宜令江浙福建委監司守臣勸誘土豪大姓赴淮南從便開墾田地歸官莊者歲收穀五百石免本戶差役一次七百石補進義副尉至四千石補進武校尉並佗

力田出身其被賞後再開墾及元數許參選如法理名
次在武舉特奏名出身之上遇科場竝得赴轉運司應
舉從之 五月戊子金以平章行臺尙書省事右副元
帥大托卜嘉舊倫撻不也今改爲行臺尙書右丞相元帥如故
壬辰以左副元帥完顏杲爲行臺尙書左丞相元帥如
故同判大宗正事宗安爲御史大夫時杲自陝西入朝
因從容言曰唐建成不道太宗以義除之卽位之後力
行善政後世稱賢陛下以前主失德大義廢絕力行善
政則如唐太宗矣金主聞言色變杲亦自悔其言金主
念杲久握兵在外頗得士心忌之陽尊以殊禮使係屬

籍以玉帶璽書賜之杲至汴詔諭托卜嘉無使杲豫軍
事杲不知每事輒爭之托卜嘉詭曰太師梁王以陝西
事屬公以河南事屬托卜嘉今未嘗別奉詔命若陝西
之事托卜嘉固不敢干涉也托卜嘉久在河南將士畏
而附之杲始至勢孤爭之不得白於朝大臣知金主旨
報曰如梁王教及詔使至汴論旨於托卜嘉使還托卜
嘉獨有附奏杲不得與聞人皆知金主使托卜嘉圖之
矣 甲午金國賀生辰使副侍衛馬步軍都指揮使完
顏思恭翰林直學士翟永固見於紫宸殿思恭等來報
金主代立既出境就遣來賀 六月甲寅徽猷閣待制

知台州蕭振始至官初海寇聚眾連年其勢益熾至是
犯台之臨門寨章安鎮故命振爲守振抵官奏乞殿前
司水軍統制王交同捕許之交至振謂之曰濱海之民
數年苦賊若能剷除願悉兵力戰以寧一方倘敗事振
當奏劾交卽具艦入海大敗賊眾餘黨散去振以數千
緡犒交士卒爲之奏功郡境遂寧 庚申捧日天武四
廂都指揮使武信軍承宣使浙江江南西路兵馬鈐轄
李橫移東路橫寓信州適貴溪魔賊竊發守臣左朝散
大夫李檉檄橫統兵以備策應遂獲安堵檉又遣離軍
人拱衛大夫果州團練使添差東南第五副將孫青統

兵出戰旋即撲滅乃詔青釐務而帥臣王昉劾及知
縣事左奉議郎葉顥右朝散大夫提舉常平茶鹽公事
權提刑張昌不能覺察致賊嘯聚竝免官仍削二秩
癸亥特進觀文殿大學士萬壽觀使兼侍讀秦煒以進
書恩遷少保 是夏故相趙鼎之子右承事郎汾奉鼎
喪歸葬於衢州常山縣時李光之獄始竟而守臣左中
奉大夫章傑與鼎有宿憾傑知中外士大夫平時與鼎
有簡牘往來至是又攜酒會葬意可爲奇貨乃遣兵官
同邑尉翁蒙之以搜私釀爲名馳往掩取復疑蒙之漏
言潛戒左右伺察之蒙之書片紙遣僕自後垣出密以

告汾趣令盡焚篋中書及弓刀之屬比官兵至一無所得傑怒方浹治蒙之而追汾與故侍讀范冲之子仲彪拘於官兵之所蒙之母訴於朝秦檜咎傑已甚詔移蒙之蘭溪尉下其事於浙東安撫司事遂息傑客魏挾之慨然以書譙傑長揖而歸傑亦不害挾之建陽人少有大志師事籍溪胡憲 秋七月癸未安德軍承宣使司知大宗正事士會爲昭信軍節度使 金左丞相烏達早朝以陰晦將雨意金主不視朝先趨出百官皆隨之去已而金主御殿知烏達率百官出朝惡之已丑出爲崇義軍節度使以平章政事溫都思忠爲左丞相以尙

書左丞蕭裕爲平章政事以右丞劉麟爲左丞以侍衛
親軍步軍都指揮使完顏思恭爲右丞參知政事張浩
丁憂起復如故 八月甲辰朔詔特進提舉江州太平
興國宮進州居住張浚移永州 辛酉權尙書禮部侍
郎兼侍講陳誠之均州觀察使知閣門事錢愷爲大金
賀正旦使起居舍人兼權直學士院王曠副之武節大
夫和州團練使權知閣門事趙述爲生辰使副述嘗在
遣中以疾免至是復命之初東昏王之世皇太后歲遺
裴磨申后禮物巨萬及代立遂削此禮誠之比入境預
爲遜詞諭之金人竟不敢言及還帝嘉之 九月丙戌

詔金國人使自今於淮陰縣取接令本路轉運判官沈
調如法修葺館舍以金人言人使合於近便處山東邳
州路取接往來故也。自建炎初劇盜范汝爲竊發於
建之甌寧縣朝廷命大軍討平之然其民悍而習爲暴
小遇歲饑卽羣起剽掠去歲因旱凶民杜八子者乘時
嘯聚遂破建陽是夏民張大一李大二復於回源洞中
佯亂安撫使仍歲調兵擊之。庚午參知政事余堯弼
簽書樞密院事巫伋請自今參遯依典故權赴太師秦
檜府第聚議從之時檜以疾在告故也。甲午金立惠
妃圖克坦舊倫徒單今改氏爲皇后金主喜飾詐初爲宰相妾

賸不過數人及篡位圖克坦氏以岐國妃進位皇后妾
大氏蕭氏叩律氏以次進封其後遲欲無厭淫肆蠱惑
不能自制矣 十月癸卯金太師領三省事助致仕助
見宗本以無罪見誅髭鬚頓白因上表請老金主初不
許賜以玉帶優詔諭之有大事令宰相就第商議入朝
不拜助遂稱病篤表請益切金主不憚從之後與宗室
俱遷中都 辛未金殺太皇太妃蕭氏太祖妃也金主
之母大氏既尊爲太后每有宴集太妃坐上坐大氏執
婦禮金主積不能平乃誣太妃以隱惡殺之并及其所
生子任王 金主欲殺遼王舍音子孫及平章政事宗

義等元帥令史約索

舊倫遜設今改

希金主旨誣左副元帥杲

父子謀反約索先學杲手署及印文詐爲契丹小字家

書與其子宗安從左都監渾都

舊倫奔都今改

上變封題倫已

經開拆者書紙隱隱有白字倫曾經水浸致字畫分明

者稱御史大夫宗安於官門外遺下約索拾得之其書

多怨望謀逆語有司鞫問宗安不服曰使真有此書我

剖肌膚藏之猶恐洩漏安得於朝門下遺之掠笞楚毒

宗安神色不變宗義不勝掙掠自誣服宗安曰今雖無

以自明九泉之下當有冤對吾終不能引屈竟不服而

死金主使人殺杲於汴宗義等論死皆滅其族以魏王

之孫呼爾察

舊倫活里
甲今改

好修飾亦族之果既死金之宿

將盡矣

十一月癸未國子監李琳言本監經史未備

請下諸州有本處起發從之

金尙書左丞相劉筈罷

以會寧牧圖克坦恭爲平章政事尙書左丞劉麟右丞

完顏思恭罷以參知政事張浩爲尙書右丞乙酉以行

臺尙書左丞張通古爲尙書左丞

戊子金主戒約官

吏 己丑金主命庶官許置次室二人百姓亦許置妾

十二月癸卯朔金詔去羣臣所上尊號

丙午金初

定襲封衍聖公俸格命外官去所屬百里外者不許參

謁百里內者往還不得過三日

癸丑金立太祖射碑

於吉迪勒部金主及皇后致奠於碑下 乙卯金有司
奏慶雲見金主曰自今瑞應毋得上聞 己未金罷行
臺尙書省事改都元帥府爲樞密院以左副元帥大托
卜嘉爲尙書右丞相兼中書令參知行臺省事張中孚
爲參知政事都元帥克爲樞密使太尉領三省如故元
帥左監軍昂爲樞密副使刑部尙書趙資福爲御史大
夫 己巳金賀正旦使正奉大夫祕書監兼左諫議大
夫蕭頤等入見於紫宸殿

紹興二十一年

金天德三年

春正月乙亥金參知政事蕭玉

丁憂起復如故丁亥金初造燈山於宮中 甲午左宣

義郎曹筠知衢州筠自御史斥去會衢州闕守帝諭秦
檜曰臺諫無大過惡當優假之以來言者 金初置國
子監金主謂御史大夫趙資福曰汝等多徇私情未聞
有所彈劾朕甚不取自今舉劾無憚權貴 乙未帝曰
布衣步孝友上書言丹陽練湖堙塞艱於漕運可諭漕
臣修治 金主出獵宰相以下辭於近郊金主駐馬戒
之曰朕不憎高爵厚祿以任汝等比問事多畱滯豈汝
等苟圖自安不以民事爲念耶自今朕將察其勤惰以
爲賞罰其各勉之 丁酉白虹貫日 丁未直祕閣知
靜江府方滋陞直敷文閣知廣州左朝散郎廣南西路

轉運判官陳璣知靜江府初朝廷命廣西帥臣卽橫山
寨市馬於大理諸蠻歲捐黃金五十鎰白金三百斤綿
絕四千廉州鹽二百萬斤而得馬千有五百匹良馬高
五尺率直中金五鎰它以是爲差每五十匹爲綱選使
臣部送至行在及建康鎮江府太平池州諸軍先是廉
州之鹽分令欽橫賓貴潯梧藤象柳容等州轉至橫山
倉然諸州科民則苦富民差吏則雜私販往往陷沒畱
滯至璣始令官支腳錢選使臣運鹽若及十萬斤卽與
部良馬一綱至行在 丁巳金主還京 己未詔諸州
各置惠民局初軍器監丞齊旦請令州縣合藥散民上

恐不能徧及故命戶部舉舊法行之仍命母多取利

大理少卿李如岡權尙書吏部侍郎 壬戌詔端明殿

學士簽書樞密院事巫伋充大金祈請使保信軍節度

使領閣門事鄭藻副之請歸宗族等 是月集英殿修

撰提舉江州太平興國宮魏疋卒於衢州自秦檜用事

士大夫少失其意禍輒不測當始議和時疋與檜異論

檜嘗欲除近郡疋遜辭不就奉祠十餘年寓居常山僧

舍一室蕭然卒免於禍焉初趙鼎旣謫居嘗謂其客左

奉議郎方疇曰自鼎在相除正府外所引從官如常同

胡寅張致遠張九成潘良貴呂本中魏疋皆有士望異

日決可保其無它疇曰願公徐觀之其後諸人各久流落雖死不變疇乃信服三月丁亥帝曰州縣多催理積欠民間重困朕頃在京東親覩其害可令戶部照年分蠲放既而戶部請自紹興十一年至十七年諸色拖欠錢物除形勢及公吏卿司與上上有力之家未納數外竝與放免從之壬辰金廣燕京城建宮室夏四

月甲辰起居舍人權直學士院王暉權尙書禮部侍郎

以使還遷也丙午金主詔遷都燕京

致異繫年要錄載金主詔曰昨

因綏撫南服分置行臺時則邊防未寧法令未具本非永計只是從權既而人拘道路之還事有歲時之滯凡申款而待報乃欲速而愈遲今既庶政惟和四方無侮用併尙書之亞省會歸機政於朝廷又以京師粵在一

閭而方疆廣於萬里以北則民清而事簡以南則地遠而事繁浚慮州府申陳或至半年而往復問閭疾苦何由期月而周知供饋困於轉輸使命苦於驛頓未可時巡於四表莫如經營於兩都眷惟全燕實爲要會將因宮廟而創官府之署廣阡陌以展西南之城勿憚暫時之艱以就得中之制所貴兩京一體保宗社於萬年四海一家安黎元於九府咨爾中外體予至懷將軍等每名各支賞銀帛九匹兩詔後率執列銜者九人其稱皇弟太尉領三省事樞密使秦國土則金主之弟亢起復特進參知政事滕國公則蕭裕也又按金翰林直學士趙可文集載其所撰都人進義何公墓碣云天德三年展都城或薦公於用事者於是東阡西陌線引墓市其制蓋皆出於公焉天德三年則今年也按要錄祇據傳聞之詞繫於歲末誤也今從金史載在四月辛酉

金有司圖上燕城宮室制度營建陰陽五姓所宜金主曰國家吉凶在德不在地使桀紂居之雖卜善地何益使堯舜居之何用卜爲金主與侍臣燕語輒引古賢君

以自況云

丙寅金罷歲貢鷹隼

閏月辛未朔金命

尙書右丞張浩右丞蔡松年調諸路夫匠築燕京官室

致異宇文懋昭大金國志云天德二年七月除大使梁漢臣爲右丞相一日官中燕問謂漢臣曰朕栽蓮二百本俱死何也漢臣曰自古江南爲橘江北爲枳非種者不能栽蓋地勢然也上京地寒唯燕京地暖可栽蓮者日依卿所請擇日而遷漢臣曰且未可遽遷待臣起諸州工役修整內院然後遷都金主從其言案梁漢臣未嘗爲右丞相又起諸州夫匠亦非漢臣事國志誤也金史云命尙書右丞張浩調遷燕京仍諭浩無私徇據國志則蔡松年實與浩共事今補入丙子金主命大臣常膳唯進魚肉舊

貢鵞鴨等悉罷之金主欲示人以儉故有是命然游獵

頓次不時需索一鵞一鶉民間或用數萬售之有以一

牛易一鶉者帝親試南省舉人擢趙達等四百四人

及第出身特奏名進士昌永等五百三十一人武舉進士湯鷟等六人授官有差帝親書大學篇賜新及第進士金主旣殺諸宗室釋其婦女皆欲納之宮中使圖克坦貞諷蕭裕曰朕嗣續未廣此黨人婦女有朕中外親納之宮中何如裕曰近殺宗室中外異議紛紜柰何復爲此耶金主曰吾固知裕不肯從乃使貞自以己意諷裕必欲裕等請其事貞謂裕曰上意已有所屬公固止之將成疾矣裕曰必不肯已唯上擇焉貞曰必欲公等白之裕不得已乃具奏五月納宗本宗固之子婦秉德之弟妻俱入宮中 戊午金主使翰林學士崇政大

夫知制誥兼太子少詹事劉長言昭毅大將軍殿前右
衛充龍翔軍都指揮使耶律夔來賀天申節 檢校少
師奉國軍節度使御前諸軍都統制知興州吳璘檢校
少保武當軍節度使御前諸軍都統制知興元府楊政
定江軍節度使殿前都虞候鄂州駐劄御前諸軍都統
制提領營田田師中立爲太尉璘等建節皆十年以其
守遯安靜故有是命 乙丑秦檜請令國子監復刻五
經三史帝曰其它闕書亦令大第雕板雖重有所費亦
不惜也 六月辛巳詔大理寺三衙及州縣歲支官錢
合藥以療病囚 秋七月丁未秦檜請勿稅商販柴米

帝曰甚善臨安自減定物價之後盜賊消矣 己未安
德軍節度使開府儀同三司權主奉濮安懿王祠事士
棣薨追封通化郡王諡孝敬 庚申修天章閣神御殿
成 八月壬申揚武翊運功臣太傅鎮南武安寧國軍
節度使充醴泉觀使咸安郡王韓世忠爲太師致仕是
日世忠薨於賜第年六十三始世忠得疾帝飭太醫馳
視問訪之使相屬於道將吏問疾卧內世忠曰吾以布
衣百戰致位公王賴天之靈得全首領臥家而沒諸君
尙哀其死耶世忠少時慄悍絕人不用鞭轡能騎生馬
駒其制兵器凡跳澗以習騎洞貫以習射後獵之鏐連

鎖之甲斧之有掠陳弓之有克敵皆世忠遺法嘗中毒矢洞骨則以強弩拔之十指僅全四不能動身被金瘡如刻畫晚奉朝請絕口不言功名自罷政居都城高臥十年若未嘗有權位者而偏裨部曲往往致身通顯節鉞相望歲時造門類皆謝遣獨好浮圖法自號清涼居士于時舉朝憚秦檜權力皆附麗爲自全計世忠於班列一指之外不復與親逮薨有詔選日臨奠檜遣中書吏韓瑊以危語脅其家辭而止追封通義郡王其子直敷文閣彥直直祕閣彥樸彥質彥古皆進職二等又命睿思殿祇候徐伸護葬事 乙亥寶文閣學士提舉江

州太平興國宮梁揚祖卒贈特進龍圖閣學士賜其家
銀帛三百匹兩 甲申中書門下省校正諸房公事陳
夔武功大夫惠州刺史權知閣門事蘇華充賀金國正
旦使副樞密院檢詳諸房文字陳相武節大夫吉州刺
史權知閣門事孟思恭充賀生辰使副 辛卯詔昭信
軍節度使知大宗正事士權主奉濮安懿王祠事 時
有言贍學公田多爲權勢之家所占九月戊戌朔帝謂
宰執曰緣不度僧常住多絕產令戶部撥以贍學 庚
戌金賜燕京役夫帛一匹 丁巳增築景靈宮用韓世
忠賜第爲之前殿五楹中殿七楹後殿十有七楹齋殿

進食殿皆備焉期年而畢 庚申右正言章厦試右諫

議大夫 是月簽書樞密院事巫伋自金使還致異徐夢莘北

盟會編云巫伋鄭藻以祈請使於金國引見內殿奏公事惟正使巫伋得入金主問所請者何事伋首言乞修奉陵寢金主令譯者傳言自有看墳人第二言乞迎請靖康帝歸國又令譯者言不知歸後甚處頓放第三言本朝稱皇帝二字又令譯者傳言此是你國中事當自理會伋唯唯而退待辭而歸趙姓之遺史曰巫伋乞祈請使而無祈請之辭投書而已議者謂不識字之承旨可優爲也案金史云朱遣使祈請山陵是當時祈請山陵而金人不許耳 甲戌帝幸太傅醴泉觀使清河郡王張俊

第壬午制拜俊太師以其姪龍神衛四廂都指揮使清海軍承宣使添差兩浙西路馬步軍副都總管子蓋爲德安軍節度使餘子弟遷官進職者十有三人幹辦府

武功大夫尙準制轉行右武大夫管轄親兵濠州團練使顧暉除防禦使皆異數也 是月加封吳將甘寧爲

昭毅武惠遺愛靈顯王 十一月戊寅參知政事余堯

弼罷右諫議大夫章厦殿中侍御史林大鼐其劾堯弼

傾邪貪鄙交通三衙結諸州將朝廷有大議論則閤默

無言請貶之以清政府詔堯弼充資政殿學士提舉江

州太平興國宮尋落職 斬有陰人惠俊以指斥乘輿

法寺鞠實故也 十二月己丑親衛大夫利州觀察使

馬廣卒 癸巳金主使驃騎上將軍殿前右副都點檢

魯定方大中大夫右諫議大夫祕書少監蕭永祿來賀

宋年正旦

紹興二十二年

金天德四年

春正月丁酉朔金羣臣請立皇

太子從之戊戌初定東宮官屬立捕盜賞格 丁未少

師昭慶軍節度使萬壽觀使平樂郡王韋淵爲太保

癸卯太白經天 癸亥金主朝謁世祖太祖太宗德宗

陵甲子還宮 二月丁卯金立皇子允英爲皇太子庚

午詔中外 甲戌金主如燕京昭義軍節度使蕭仲宣

家奴告其主怨謫金主曰仲宣之姪拱近以謫誅故妄

訴命殺告者 庚辰軍器監丞黃然論沿江一帶稅務

比來非理邀取商旅患之於是號斬之斬陽江之湖口

池之鴈汊爲大小法場咸謂利歸公家無幾而爲吏竊
取大半宜令所隸州縣選官檢察收放漕臣攷察從之
壬午詔建祚德廟於臨安府用殿中侍御史林大鼐
請也先是毀其廟以爲大理寺而大鼐言三人者有大
功德於聖朝今神靈不安士庶悲嗟宜進齋加獎尋進
封程嬰爲強濟公公孫杵臼爲英略公韓厥爲啟佑公
陞爲中祀 戊子金主次泰州 三月庚戌徽猷閣直
學士致仕向子諲卒於臨江軍子諲旣告老歸玉筍之
舊隱號曰薌林凡十五年而卒 丁巳詔新除司農寺
丞鍾世明往福建路措置寺觀常住絕產時鬻度僧道

牒已久停其徒寢少而福建官自運鹽直頗貴於是民多私販議者以爲客販可行遂命世明往本路措置凡僧道之見存者計口給食餘則爲寬剩之數籍歸於官其後世明言自租賦及常住歲用外歲得羨錢二十四萬緡詔付左藏庫 戊午資政殿學士提舉江州太平興國宮何鑄薨後謚忠敏 己未祕書省校書郎董德元論高禩名爲大祀而禩神乃位於壇下酌用一獻恐非所宜請與青帝分爲二壇詔禮部看詳 癸酉右諫議大夫章厦試御史中丞殿中侍御史林大鼐試右諫議大夫 夏四月丙寅朔金有司請今歲河南北選人

竝赴中京銓注從之 丙子端明殿學士簽書樞密院
事丞弼罷弼與秦檜居同鄉一日檜在都堂偶問弼云
里中有何新事弼不敢對徐云近有一術士自鄉里來
頗能論命其意恐輒及時事或觸檜怒故泛舉不切之
事以塞責檜遂變色謂弼曰是人言公何日拜相弼皇
恐而罷章厦聞之卽劾弼陰懷異意以搖國是林大鼐
亦奏弼黷貨營私於是竝遷二人而弼以本職提舉江
州太平興國宮章再上遂落職辛巳章厦拜端明殿學
士簽書樞密院事 丙戌孟嘗景靈宮令宰執分詣時
新宮未成祖宗神御皆寓於西齋殿故也 壬辰秦檜

奏利州觀察使王俊往在岳飛軍中彈壓有勞以爲浙東馬步軍副都總管 庚戌封婕妤劉氏爲婉容新興郡夫人吳氏宜春郡夫人劉氏竝爲才人宮中號婉容爲大劉娘子才人爲小劉娘子 癸丑金主使宣奉大夫刑部尙書行大理卿田秀穎安遠大將軍充客省使兼四方館副使大允來賀天申節 襄陽大水平地丈五尺漢水冒城而入右朝奉大夫知府事榮薤乘桴得免於是與轉運判官魏安行議請復環城石隄以捍水許之次年冬按四縣之籍計田出力百畝一夫得三千餘人減其田畝十之二凡五旬有七日而畢計用工二

十五萬有奇其長四十餘里 是月金主自泰州如涼
陁 五月丁酉金主出獵甲寅賜獵士人一羊 乙卯
金主次臨潢府 丁巳太白經天 六月甲子朔金主
駐綿山 乙酉奉安祖宗帝后神御於景靈宮 戊子
大理少卿章燾請申嚴暑月浣濯獄具之令從之 壬
辰起居舍人權直學士院湯思退權尙書禮部侍郎
金從義軍節度使烏達旣外出其妻唐古鼎格舊與金
主通金主念之秋七月癸卯使鼎格縊殺烏達而納鼎
格於宮中尋封貴妃 乙卯詔仲冬薦獻永佑陵等攢
宮及檢察禁地就差大宗正丞馮至游故事太常少卿

以春秋二仲行園陵至是太常官全闕但以祕書省著
伦佐郎丁婁明兼權婁明請於朝至游供職紹興就遣
之也 丁巳虔州軍亂初江西多盜而虔州尤甚故命
殿前司統制吳進以所部戍之虔之禁卒嘗捕寇有勞
江西安撫司統領馬晟將之與進軍素不相下會步軍
司遣將揀州之禁軍而眾不欲行有齊述者以賂結所
司選其徒之強壯者以捕盜爲名分往諸縣夜兩軍交
關州兵因攻城伦亂殺進晟遂焚居民逐官吏守臣
八月癸亥金主獵於圖彌山 己卯江西安撫使張澄
言虔州兵亂詔鄂州諸軍統制田師中速遣兵仍合澄

集本路兵擒捕後二日又遣殿前司遊奕軍統制李耕
將所部千六百人往討之 丙戌尙書司封員外郎兼
權國子司業孫仲鼇爲大金賀正旦使閣門宣贊舍人
陳靖副之吏部員外郎李琳爲賀生辰使忠州防禦使
帶御器械石靖副之 乙未詔殿前司左翼軍統制陳
敏以所部討虔州叛兵先是叛兵突出徑走南康軍而
寓居左朝奉郎田如鼇爲其所得遂復還據虔城時李
耕纔至江東而敏駐溫陵被本路安撫司檄以所部千
五百人護閩境於是領殿前都指揮使楊杓中言敏本
虔人且嘗於江西捕寇有功望令進攻與耕併力討賊

乃以如鼇權江西提點刑獄公事令卽城中撫定之
九月甲午金主如中京獨畱圖克坦太后於上京圖克
坦太后常憂懼每中使至必易衣以俟命皇太后大氏
在中京常思念圖克坦太后謂金主曰永壽宮待我母
子甚厚慎無相忘也 癸卯右諫議大夫林大鼐言兵
弛久佚主將輒移其力而它役之今有伐山爲薪炭聚
木爲簞筏行商坐賈開酒坊解質庫名爲贍軍回易而
實役人以自利甚至有差徭白直爲厮隸之賤供土木
之工請詔中外將帥遵守祖宗條法仍取約束未盡者
增廣行之詔刑部檢見行條法行下諸軍遵守內僭人

一節俗者與僧之者竝同罪 丙午升廣州香山鎮爲

縣 金尙書右丞相大托卜嘉罷 戊申升桂陽監爲

縣 己酉殿中侍御史兼崇政殿說書宋樸爲侍御史

樸甫受命卽劾端明殿學士簽書樞密院事張厦多納

賄賂引致帑井小人以爲肘腋平居備位充數未見有

害一旦臨大利害內懷姦邪外肆譖險必致敗事而後

已右諫議大夫林大鼐亦論厦斗筭小器一旦致身宥

密之地議論喧然皆曰章新婦也佗兩府言厦爲人踧

踏無儀矩也況又背公營私附下罔上朝廷機密無不

洩漏宜亟加黜責以爲貪懦素餐之戒癸丑詔章厦以

本職提舉江州太平興國宮章再上遂奪職屢入樞府
才九十三日 己未右諫議大夫林大鼐試吏部尙書
尙書左司員外郎陳相權吏部侍郎 冬十月壬戌
朔侍御史兼崇政殿說書宋樸試御史中丞 金遣使
奉遷太廟神主 初殿前司遊奕軍統制李耕左翼軍
統制陳敏副將周成鄂州副統制張訓通池州統領崔
定殿前司摧鋒軍統制兼知循州張寧皆以兵至虔州
城下而敏所部統領官元玘戰死旣而權江西提點刑
獄公事田如鼇在城中與賊黨齊述謀誅首亂者蕭容
等四十餘人卽以撫定聞於朝耕往受其降述等列拜

城上而終不冑出有詔如鼇果是撫定令素隊軍前與免究詔耕諭述等速出降卽不進兵述欲聽命爲其子所制但列眾於城上聲喏而拜終不冑出是日如鼇自出城與耕相見耕遂畱之有父老數十人詣耕乞令如鼇復入耕叱之去因密言賊已穴地道欲出犯官軍宜防之耕卽以其兵二百人送如鼇還南康軍甲子如鼇及左朝請卽施鉅竝赴行在 甲戌御史中丞兼侍講宋樸爲端明殿學士簽書樞密院事忠州團練使殿前司遊奕軍統制李耕爲龍神衛四廂都指揮使知虔州庚辰詔責授建寧軍節度副使昌化軍安置李光依

已降指揮永不檢舉徵餼閣待制知台州蕭振落職池
州居住從政郎楊煒特貸命追毀出身以來文字除名
勒停永不收叙送萬安軍編管初光旣參大政煒以和
議爲非伦書欲獻光先見振言其意光不答及是振知
台州煒爲黃巖令政頗有聲振每問煒大言無顧畏則
擊節稱善遂薦煒改秩又移書浙東提點刑獄公事秦
昌時俾同薦之昌時檜之姪也因囑吏密語振曰煒嘗
以書責光及太師昌時其姪義不當舉如待制亦不可
舉也振曰吾業已許之豈可中輟煒在官鉏治鹵惡無
所貸俄縣吏得煒書有詆檜語昌時聞於朝詔送大理

寺仍下所司發卒大索煒家得所草萬言書語益切煒具伏紹興八年在臨安府聞朝廷講和隣國煒以爲非是欲撰造語言佗書上光言更改講和之意以規進用時振任侍御史煒因見振先說書意振答云亦恐敵人難信公書意甚好遂佗書上光光覽書遣人傳語煒諭以不及答之意刑寺奏煒當死上特宥之其兄左從政卽炬亦連坐除名煒徒步赴貶所至撫州病士人鄒陶見之昇致其家出白金以贖乃得去 甲申金主殺太祖女長公主烏魯以侍婢譖訴於皇后也竝杖其夫圖克坦恭罷其平章政事 是月李耕始受知虔州之命

研既往攻城猶冀就招安賊曰健兒輩初只緣與吳統制下人爭今倫過已至此縱招安朝廷亦不赦也時城中細民皆絕食每日爲賊役者才得一二升間有出投官軍又爲賊所殺帝謂宰執曰前日差耕知虔州甚當使百姓知已有知州心有所歸也十一月戊戌金以

咸平尹李德固爲平章事辛丑金買珠於烏爾古德

埒勒

舊倫烏古
敵烈今改

部及富楚

舊倫蒲
與今改

禁百姓私相貿易仍

諭兩路民夫采珠戊申合祀天地於南郊赦天下

金以前平章政事圖克坦恭爲司徒乙卯吏部尙書

兼侍講林大鼐言武林江山之會大江潮信一日再至

頃者江流失道灘磧山積潮與洲鬪怒號激烈一城爲之不安枕雖詔守臣漕司專意隄埽日計營繕纔成卽決不支年歲臣以爲南至龍山北至紅亭二十里間乃潮勢奔衝之下流正迎敵受患之處雖繕治無益也望選歷練諳曉之士專置一司博詢故老講究上流利病古今脈絡而後興工或者謂錢塘之潮應有神物主之葺廟貌建浮屠付之有司此亦易事時六和塔壞又伍員祠以火廢故大鼎及之帝曰恐浸淫爲害可令乘冬月水不泛濫時治之爲易又舊有塔廟陰以相之雖出小說亦不可廢宜付禮部看詳 丁巳太常卿徐宗說

權尚書戶部侍郎

張異宗說頗有心計吏不能欺然附

因目宗說
爲莊客

是日忠州團練使知虔州李耕引兵入城

虔州平時諸軍旣集而江西馬步軍副總管劉綱右宣
教郎統押池州土豪鄉兵鄧酢皆在兵間耕招降不聽
率諸軍登城收叛卒盡誅之帝曰朕思虔賊閉城已四
十日城中乏食可諭楊存中速令濟師庶幾良民得免
困苦於是遣軍統制苗定等率兵五千馬四百往聽耕
節制定等未至聞賊平乃還賊之始佗也其徒侵軼旁
郡或勸左朝散郎南安軍居住張九成徙避之九成曰
吾謫此邦死分也何避焉守貳拒賊未得計請於九成

曰此爲廣南要衝失守則郡以南皆賊區策將安在九成曰僻小寡弱難與爭鋒今聞賊寨水南夜募善泅者火攻之俾其眾驚擾則宵遁必矣用其策賊果散走賊之未平也右宣教郎知醴陵縣鮮于廣曰是五日可至吾邑告於府請以所部兵列境上畱民租於縣以爲食提點刑獄司命五里建一樓民持粟其上廣曰是當爲六十八樓重費民不可且盜必從官道來耶獨取鄉保伍之壯者選其豪六十領之它盜亦不敢犯 十二月己巳太尉安慶軍節度使提舉萬壽觀邢孝揚薨諡忠靖 戊子金主使太子詹事張利用廣威將軍尙書兵

部郎中兼四方館副使釋益溫都子敬來賀明年正旦
庚寅金太尉領三省事樞密使充卒充金主弟也

續資治通鑑卷第一百二十九